

四庫全書

子部

欽定四庫全書

格致鏡原卷五十四

大學士陳元龍撰

居處器物類二

被

總論 物原神農作被 孔注寢衣今之被也 詩國

風抱衾與裯 身章撮要大被曰衾單被曰裯世人或

以錦繡或以布素或以楮皮為之取其暖自適也 楚

辭翡翠珠被爛齊光些王逸注言牀上之被則飾以翡

翠之羽及與珠璣刻畫衆花其文爛然而同光明 陳
繼儒犀碎錄緣池池者緣飾之名謂其形象水池耳今
被頭別施帛為緣呼為被池宋子京詩春寒到被池
田藝衡留青日札今之色被橫其臥邊緣幅作異色曰
當頭當去聲即古被池之遺製

古人被 公孫宏傳宏為三公臥布被飾詐以釣名
漢官典職漢尚書郎入直供青綾被或錦被 西京雜
記趙飛燕為后女弟昭容上襪三十五條有鴛鴦被

東宮舊事太子納妃有七彩文綺被一絳羅四幅被四
繡羅五幅被一誠齋雜記孟宗少游學其母制十二
幅被以招賢士共臥庶得聞君子之言桓任別傳任
後母酷惡常憎任為作二幅箕踵之被南史陳大建
七年陳挑根上織成羅紋錦被各二詔於龍門外焚之
李肇翰林志興元元年勅翰林學士給青綺錦被
杜陽雜編同昌公主室中設神絲被繡三千鴛鴦間以
奇花異卉精巧華麗絕比其上綴以靈粟之珠珠如粟粒

五色輝映 杜陽雜編唐元和八年大軫國貢神錦被
冰蠶絲所織也方二丈厚一寸其上龍文鳳彩殆非人
工暑月覆之清涼透體 清異錄莊宗滅梁平蜀志頗
自逸命蜀匠旋織十幅無縫錦為被材被成賜名六合
被 輟耕錄孟蜀主一錦被其潤猶今之三幅帛而一
梭織成被頭作二穴若雲板樣蓋以叩于項下如盤頰
狀兩側餘錦則擁覆於肩此之謂鴛衾也楊樞密公云
嘗於宋官庫見之 山堂肆考宋陸務觀有謝待制朱

丈貺紙被詩 元氏掖庭記帝為英英起采芳館設重

樓金線之衾重樓金線花名也出長白山花心抽絲如
金長至四五尺每尺寸縛結如樓形山人取以織之
成幅 庶物異名疏禿髮鮮卑稱被也壽蘭之在孕母
胡掖氏因寢而產於被中遂以禿髮為姓 楊慎滇載
記雲南段功妻梁王女阿嵯主也王聽譖殺功主作愁
憤詩有悞我一生路裏彩之句路裏彩錦被名 嶺表
錄南道之酋豪多選鵝之細毛夾以巾帛綿絮而為被

復縱橫衲之其溫柔不減於挾纊也俗云鵝毛柔軟而
性冷偏宜覆小兒能辟驚癇疾 朱輔溪蠻叢笑茅花
被玃撿無綿揉茅花絮布被一被數幅聯貫以成山猺
皆臥板夜然以火玃撿視猺則為富矣 事物紺珠洞
被出黎平苧布為質彩綫挑刺成

枕

總論 逸雅枕檢也所以檢項也 物原神農作枕
詩角枕粲兮 彙苑詳註頭藉斗古者十斗曰枕首有

角今五斗曰枕

寶枕 拾遺記漢誅梁冀得一玉虎頭枕云單池國所獻其額下有篆書字云帝辛之枕帝與妲己同枕之是殷時遺寶也 西京雜記合德遺飛燕琥珀枕龜文枕洞冥記設元珉雕枕刻黑玉銅鏤為日月雲雷之狀亦曰鏤雲枕 洛神賦注黃初中東阿王入朝帝示甄后玉鏤金帶枕 宋武帝本紀寧州常獻虎珀枕光色甚麗價盈百金時將北伐以虎魄療金創武帝大悅命

碎分賜諸將 國史補唐盧昂主福建鹽鐵贓罪大發
有瑟瑟枕大如斗斛以金牀乘之憲宗估其值曰至寶
無價 張讀宣室志韋弁遇玉清之女持寶以贈出一
枕似玉微紅有紋如粟竒光炳然曰紅瑟瑟枕也 韻府
七寶枕織女枕也嘗留贈郭翰 明皇雜錄同昌公主
有鷓鴣枕以七寶合成為鷓鴣之形 唐書御史劾盜
得浮屠辯機金寶神枕自言合浦公主所賜 犀書考
索宋太祖建隆二年于闐國王遣使來貢玉枕以玉匣

盛之家世舊事程少師有綠玉枕 解醒語西僧楊

璉真伽發宋理宗陵得伏虎枕七寶合成伏虎之狀

邵氏聞見錄洛陽楚氏所寶水晶枕其間有半開杏花

一枝 妃古錄蔡君謨水精枕中有桃一枝宛如新折

木枕 劉向別錄有芳松枕 吳書張紘見柗榴枕愛

其文為作賦 蘇彥楠榴枕銘珍木之奇文鬱理鮮庶

稜方正密滑真堅 酉陽雜俎臺山有色綾木理如綾

紋窠百姓取為枕呼色綾枕 搜神記邛都縣四十里

一時俱陷為湖土人謂之為陷湖今水淺時彼土人沒水取得舊木堅貞光黑如漆好事人以為枕相贈 楊慎外集取黃楊木作枕必以陰晦無一星則伐之為枕不裂

石枕 異苑滕放夏枕文石枕臥忽暴雷震其枕四解旁人莫不為之怖懾而放微覺有聲不怖也其所枕蓋六安也 酉陽雜俎汴州民趙懷正妻賀以一環易一石枕趙枕之中如風雨聲毀視之中有金銀各一鋌如

模鑄者所函鋌處其模似預曾勘入無絲髮隙不知從何而入也 歐陽修詩序有贈予以端谿綠石枕者與家所藏笛竹簟皆佳物也 豐寧傳益眼者無如磁石為枕可老而不昏寧皇宮中多用之

諸枕 神仙傳漢武帝東巡見泰山老父鋤於道頭上白光高數尺呼問之對曰有道士教臣作神枕枕有三十二竅二十四竅應二十四氣八竅應八風臣行之轉少齒生 道齋李少君有透骨之金大如彈丸凡物近

之便成金色帝試以檀香屑共聚一處置李夫人枕傍
詰旦視之皆化為金屑銷之不更變視其枕亦微有金
光遂號為金光枕 虎苑李廣與兄弟獵於宜山見臥
虎射之一矢即殪斷其頭為枕示服猛也今人作虎枕
自廣始 北堂書鈔崔駰六安枕銘云枕有規矩恭一
其德承元寧躬終始不忒案六安枕言六面安也 漢
官儀後漢尚書郎入直官給通中枕 魏武上雜物疏
御物有漆畫韋枕二枚貴人公主有黑漆韋枕三十枚

魏略大秦國出五色枕 晉東宮舊事皇太子納妃

有漆龍頭支髻枕一銀花銀鈕自副 黃魯直集支髻

枕庾公所作蓋今俗山枕 焦氏類林洪崖先生欲歸

河內舍人劉守璋贈先生四皓鹿角枕 南史有賀徽

者美色梁元帝徐妃要之於普賢尼寺書白角枕為詩

相贈答 北史高昌出白鹽其形如玉高昌人取以為

枕魏時遣使獻鹽枕 朝野僉載逆韋之妹馮太和之

妻號七姨信邪見為豹頭枕以辟邪白澤枕以去魅作

伏熊枕以為宜男太和死嗣號王娶之韋之敗也號王
斫七姨頭送朝堂則知辟邪之枕無効矣 李肇翰林
志翰林學士給漆通中枕 清異錄舒雅作青紗連二
枕滿貯餘醺木犀瑞香散蕊甚益鼻根 清異錄盧文
紀有玉枕骨故凡枕之堅實者俱不可用親舊間作楊
花枕贈之遂獲安寢自是縫青繒充以柳絮一年一易
常新錄宣城妓史鳳待異客以神鷄枕 吳越備史
武肅王錢鏐在軍中未嘗安寢用圓木作枕睡熟則敲

由是得寤名曰警枕 范祖禹集司馬溫公以圓木為

警枕少睡則枕轉而覺乃起讀書 胡侍珍珠船警枕

不始於司馬溫公蔡中郎有警枕銘禮記少儀弓茵席

枕几頽杖琴瑟戈註云頽警枕也謂之頽者頽然警悟

也 歐公試筆介甫嘗云夏月晝睡方枕為佳問其何

理云睡久氣蒸枕熱則轉一方冷處 山家清事秋采

山甘菊花貯以紅綦布囊作枕用能清頭目去邪穢

事物紺珠丹枕赤皮疊布貯兜羅綿及毛西域無木故

以此為之

異枕 廣德神異錄有海外國貢重明枕長一尺二寸
高六寸潔白類於水精中有樓臺之形四面有十道士
持香執簡循環無已謂之行道真人其鏤木丹青真人
之首簪帔無不悉具仍通瑩焉如水睹物 開元遺事
龜茲國進枕一具色若瑪瑙溫潤如玉製作甚樸素枕
之而寐則十洲三島盡在夢中帝因號遊仙枕後賜楊
國忠 開元遺事虢國夫人有夜明枕置於堂中紅光

照室不假燈燭 李泌枕中記開元中道者呂翁經邯

鄲道上遇少年盧生自歎生世不諧是時主人蒸黃粱
為饌翁乃探囊中枕以授之曰子枕此當令子榮適如
志其枕瓷而竅其兩端生俯首就之寐中見其竅大而
明若可處舉身而入遂至其家娶妻仕宦三十餘年間
赫奕無比既寤黃粱尚未熟 清異錄左宮枕青玉為
之體方平長可寢二人冬溫夏涼醉者破醒夢者游仙
云是左宮王夫人枕左宮以授杜光庭光庭進之蜀主

與皇明帳為幃宮二寶 物類相感志咸熙二年宮中
夜夜有白色異獸光潔遶宮帝使宮者伺之見白虎子
以戈投之中左目比往取之唯見血在地不復見虎搜
檢宮內外不見得物唯寶庫內得一玉虎頭枕左目傷
痕濕血存焉按此枕漢梁冀經用本是單池國所貢領
下篆字存焉 事物紺珠余尚書靖知桂州時有極深
林中每月盈夕聞笛聲甚清遠公令人迹之見其聲自
一大柏木中出乃伐為枕笛聲如期公甚寶之公季弟

欲窮其怪命工解視但見木之文理正如人月下吹笛
像雖良工莫及復膠合之不復有聲 珍玩考偶武孟
吳之太倉人也嘗為武岡州幕官因鑿渠得一瓦枕枕
之聞其中鳴鼓起一更至五更次第更轉不差既聞鷄
鳴亦至三唱而曉抵暮復然武孟以為鬼物令碎之見
其中設機局以應夜氣識者以為諸葛武侯雞鳴枕也

席 附筵 薦

總論 逸雅席釋也可卷可釋也 物原神農作席薦

禮天子之席五重諸侯三重大夫再重士不重 鹽
鐵論古者皮毛草蓍無茵席之加旃弱之美其後大夫
士複薦草緣蒲平單莞庶人即草蓍索經單藺遽蔭而
已今富者繡茵翟柔蒲子露林中者獮皮代旃闌坐平
莞 唐書守宮署供蕃客帷席則題歲月席壽三年

名類 周禮司几筵掌五几五席之名物凡大朝覲設
莞筵紛純加縹席畫純加次席黼純諸侯祭祀席蒲筵
績純加莞席紛純甸設熊席喪事設葦席 尚書茂

席黼純筍席元純底席綴純豐席畫純注茂桃枝竹也
筍弱竹也底弱華也豐莞也純緣也並天子朝燕之席
禮記大路素而越席注越蒲屬祭天之車翦蒲為席
也 禮記浴出杆履蒯席 邢疏蓐一名茲茲者蓐席
也言草蓐之席也 庶物異名疏荀子龍茲亦謂為席
謂龍鬚席也 拾遺記軒皇使百辟羣臣列主於蘭蒲
席上 韓子夏禹為茵蔕席 拾遺記周穆王時西王
母來獻碧蒲之席 拾遺記燕昭王設鱗文席鱗文者

錯雜寶飾席為雲霧麟鳳者也 漢舊儀祭天用六采
綺席祭地登紫壇用紺席祭嶽用白菅席 漢書文帝
莞蒲為席 神仙傳淮南王為八公設象牙席 西京
雜記趙飛燕為皇后其女弟上柳葉席 趙飛燕傳飛
燕為皇后其女弟上遺回風席 西京雜記趙昭儀設
綠熊席席毛長二尺餘人眠而擁毛自蔽望之不能見
坐則沒膝其中雜熏諸香一坐此席餘香百日不歇
漢史丹傳頓首伏青蒲上 服虔曰青綠蒲席也孟康

曰以蒲青為席用蔽地也

皇甫謐高士傳老萊子親

沒隱蒙山之陽蒼艾為席

周斐汝南先賢傳鄭敬以

茅段為席常隨杞柳之陰

晉東宮舊事太子有獨坐

龍鬚席赤皮席花席經席

崔祖思政事疏宋武帝節

儉過人張妃房唯有三齊衽席

劉宋起居注御史中

丞奏風聞廣州刺史韋朗於州部作菟白席三百二十

領注即今番舶之地隅也有紅白雜色茅菟染紅故曰

菟白南史梁武時海中浮鵲山去餘姚岸可千餘里

上有女人年三百歲有女官道士四五百人年並出百歲俱在山學道遣使獻紅席帝方捨身時其使適至云此草常有紅鳥居下故以為名觀其圖狀則鸞鳥也

鄴中記石季龍作席以金裹五香雜以五采綫編蒲皮緣之以錦賈氏說林謝仙女盛夏上元宗以生涼之

席杜陽編憲宗迎佛骨入內道場設龍麟之席孔

六帖穎王璩濟江舟中以綵席藉步命撤之曰此可寢奈何踐之湘東備錄申王取猪毛刷淨令巧工織士

癸席滑而且涼 張鷟朝野僉載張易之母阿臧以汾
晉之龍鬚河中之鳳翮為席 孔六帖張志和豹席
酉陽雜俎安祿山所賜品目有綠白平細背席 杜陽
編處士伊祈玄解上召入宮設紫茱席色紫而類茱葉光
軟香淨冬溫夏涼此本烏弋山離國獻 清異錄顯德
中書堂設起紋秋水席色如葡萄紫而柔薄類綿疊之
可置研函中吏偶覆水水皆散去不能沾濡不識其何
物為之 拾遺記蓬萊山有段紅色可編為席溫柔如

罽毳方丈山有草名濡紆葉色如紺莖色如漆細軟可
縈海人織以為席卷之不盈一手舒之則坐方國之賓
大魏諸州記鉅鹿廣阿澤多葦出細御席 盧毓冀

州論冀州有雲母御席 地理志鳳翔府土貢龍鬚席

相州土貢鳳翮席登州土貢水蔥席 唐書南蠻環王

椰葉為席 元氏掖庭記帝為英英起采芳館於瓊華

島內設唐人滿花之席唐人高麗島名產滿花草土人

以為席 一統志朝鮮出滿花席草性柔折屈而不損

拾遺記薄乘草又名半月草其質溫柔可以為席

事物紺珠蘇薰席深碧色出墊江

筵 周禮注筵亦席也在上鋪陳曰筵在下蹈藉曰席
古人坐席三重再重各有差 三禮圖士蒲筵長七尺
廣三尺三寸無純

薦 說文弱蒲子也可為薦 拾遺記穆王時西王母

來敷黃莞之薦 漢武故事帝齋於尋真臺設紫羅薦

簞

總論

物原周公作簟

詩經上莞下簟乃安斯寢

說文簟竹席也

逸雅簟簟也布之簟簟然平正也

方言宋魏間謂之笙或謂之蘧苗自關而西謂之簟其粗者謂之蘧篠直文而粗自關而東周洛楚魏之間謂之倚佯自關而西謂之符簾清異錄宜春王從謙作夏清侯傳侯姓干名秀賜姓名為平瑩字少覃封夏清侯謂簟也

名類

西京雜記會稽竹簟供御號流黃簟以其織文

黃色滑膩若流故曰流黃 西京雜記武帝以象牙簾
賜李夫人 洞冥記吠勒國貢文犀角亦曰影犀織以
為簾如錦綺之文 東宮舊事太子納妃有烏韜赤花
雙文簾 北堂書鈔左思吳都賦云桃笙象簾韜於筒
中案桃笙竹簾也與象牙簾皆藏於竹筒而致貢也

庾翼與燕王書今致丈二細桃枝簾十黃蔑雙文簾二
王隱晉書車永為廣州刺史其子溢使多工作象牙
細簾土人患之 南史王儉嘗使賓客隸事多者賞之

唯廬江何憲為勝乃賞以五花簾王攜後至操筆便成
文章既奧辭亦華麗乃命左右抽憲簾登車而去南
史齊永明九年林邑國獻金簾盧氏雜記侯君集破
高昌所得金簾甚精御府所無五行志武后時嬖臣
張易之為母為屏簾清異錄李文饒家藏會昌所賜
大同簾具體白竹也關磨平密了無罅隙但如一度膩
玉耳雲仙散錄房壽六月召客坐糠竹簾樂天詩
注蘄州出美竹製薤葉簾北戶錄紅藤簾瓊州所出

其色殷紅瑩而不垢 地理志蘇州土貢白角簾 解
醒語許謙孫從宗言上方珍異庫有金絲簾 祝京兆
野記安南鄧上舍說其祖初入朝時貢象牙簾象簾者
凡象齒之中悉是逐條縱攢於內用法煮軟牙逐條抽
出之柔韌如線以織為席今橫截牙心有花紋即是也
縱時可抽 屠隆起居器服箋菱葦出滿喇加國生於
海之洲渚岸邊葉性柔軟鄉人取之織為細簾冬月用
之愈覺溫暖夏則蘄州之竹簾最佳

褥附褥坐

總論 逸雅褥辱也人所坐熟辱也 事始褥者席下
襯也 物原神農制褥 唐百官志守宮署掌供蕃客
帷帟則題歲月褥壽七年不及期而壞有罰 朝野雜
記舍人院每知制誥設紫褥於庭面北拜閣老立褥之
東北謂之壓角宰相壓角其禮相傳自唐 山家清事
采蒲花如柳絮者熟鞭貯以方青囊作坐褥或臥褥甚
溫煖雖木棉不可及也

名類 黃帝內傳王母為帝列七寶登真之牀敷紫茸

淨光之褥 拾遺記周靈王起昆昭之臺設紫羅文褥

西域所獻也人以指彈席而暄風入室 東方朔傳以

百岷之毫織為褥

洞冥記作蛟毫

此毫柔而冷常以夏日舒之

因名柔毫水藻之褥舉手拭之恐水濕席定視乃光也

西京雜記趙昭儀上皇后祵三十五條有鴛鴦褥

魏武與楊彪書今贈足下青氍毹褥三具 晉東宮舊

事皇太子拜有八尺褥一中褥一步輿褥一皇太子納

妃有承牀褥三獨坐褥二 南史褚澄以錢一萬千就
招提寺贖高帝所賜褚淵白貂坐褥 顏氏家訓坐暴
子方褥 樂府雜錄康老子嘗得一舊錦褥有波斯見
之曰此冰蠶繭絲所織暑月陳於坐滿室清涼 朝野
僉載張易之母阿臧為鸛貂之褥 杜陽編元載寵姬
薛瑤英處以却塵褥其褥出自句驪國云是却塵之獸
毛所為也其色殷鮮先軟無比 後山談叢王荊公嫁
女蔡氏慈壽宮賜珠褥直數十萬 諸山記武夷山神

號武夷君語村人曰汝等以八月十五日會於山頂見
幔亭綵屋設寶座施紅雲紫霞褥令男女分坐作樂宴
飲神異經北方有冰萬里厚百丈鼯鼠在水下土中
其毛長八尺可以為褥却風寒辟寒錄交州以南有
果然獸其毛長柔細滑澤色以白為質黑為文視如蒼
頭鴨脅邊斑文集十餘皮可得一褥繁文麗好細厚溫
暖辟寒錄閩粵有福清縣瀕海人家於海中蘭得一
物乃青毛坐褥人坐其上毛輒颯然豎起擁匝人腰溫

柔不可名 物類相感志南土酋豪選輕茸細鵝毛夾
布被為褥

裊 說文茵車重席也一作裊 詩國風文茵暢轂注
文茵車中所坐虎皮褥也 韓非子繆帛為茵 天寶
遺事許慎選與親友結宴於花園中未嘗設坐具使僮
僕聚落花鋪於坐下曰吾自有花裊何消坐具

坐 五侯鯖張九齡坐七寶山座論辨風生 石林燕
語我坐不知始何時唐以前猶未施用太平興國中詔

工商庶人許乘烏漆素鞵不得用狔毛暖坐則當時蓋通上下用之矣天禧元年始定兩省五品宗室將軍以上許乘狔毛暖坐餘悉禁遂為定制今文臣自中書舍人以上武臣節度使以上方許用而宗室將軍之制亦不行矣升菴外集宋學士王珪召對蕊珠殿設紫花墩命坐

氈毯

附絨毯

地衣

席上腐談氈之異名曰毛席毯之異名曰毛褥 說文

氍毹毹毹皆氍毹之屬 物原堯作氍 唐百官志氍
壽五年 事物原始氍毛席織五采唐白樂天紅錦氍
歌揀絲練綫紅藍染織作披香殿上氍 酉陽雜俎安
祿山恩寵莫比其所賜有繡鴟毛氍 聲類氍毹織毛
為席也 廣志氍毹白疊毛織近出南海 吳時外國
傳天竺國出細靡氍毹 異物志大秦國野繭織成氍
毹以羣獸五色毛雜之為鳥獸人物草木雲氣千奇萬
怪上有鸚鵡遠望軒軒若飛其文赤白黑綠紅絳金縹

碧黃十種色 風俗通織毛褥曰氍毹 潛確類書氍

毹亦曰氍毹毛席也即今之氍毹 三輔黃圖溫室規

地以罽賓氍 南史高昌國獻蒲桃氍毹 杜陽雜編

大厯中新羅國出五彩氍毹製度巧麗冠絕一時每方

寸之內即有歌舞伎樂列國山川之象忽微風入室其

上復有蜂蝶動搖驚雀飛舞俯而視之莫辨真假 服

虔通俗文氍毹細者謂之氍毹毹毹施大牀之前小榻

之上所以登而上牀也 東觀漢記景丹率衆至廣阿

光武出城外馬坐鞍置氍毹氍毹上設酒肉 班固與弟
超書月支氍毹大小相雜但細好而已 後漢西南夷
傳能作青頓氍毹註青頓今名絲頓頓音整氍毹今紫
氍也 魏略大秦國以羊毛木皮野絲作之其屬有五
色九色氍毹海東諸國所作也 南史中天竺國出氍
毹 異苑沙門有法存者住廣州善醫術遂富有八尺
氍毹作百種形象

絨毯 松江志剪絨花毯以木棉絨為經采色毛絨結

緯而翦之花樣異巧應手而出能為廣數丈者 格古
要論西洋剪絨單出西蕃絨布織者其紅綠色年遠日
晒永不退色緊而且細織大小蕃犬形方而不長又謂
之同盆單亦難得

地衣 蘇鶚杜陽雜編唐宣宗時畫八百疋官絕作魚
龍波浪文以為地衣每一舞而珠翠滿地 頤豐堂漫
書宋秦檜格天閣成鄭仲為蜀宣撫遺錦地衣一鋪檜
命鋪閣上廣袤無尺寸差 筆塵楚王希範地衣用角

簞者剖竹為細篾織之即今之蘄簞也 庶物異名疏
今京師人剖糯稻精削隨地統織之甚雅緻又有於冬
月大廳堂中織隨地毛毯堂柱礎處則分而不聯置之
乃合收舉非多人不可五色相鮮可謂侈極矣

竹夫人

合璧事類竹夫人竹几也東坡送竹几與謝秀才詩贈
君無語竹夫人 黃魯直詩序趙子充示竹夫人詩予
謂鰥臂休膝似非夫人之職而冬夏青青竹之所長予

為更名曰青奴 山堂肆考楊鐵崖有抱節君傳抱節
君謂竹夫人也

湯婆

器物叢談湯婆煖足瓶又名腳婆 山谷詩千金買腳
婆夜夜睡天明 事物原始錫奴溫足瓶也俗名湯婆
子

衣架

禮內則不敢縣於夫之櫛梳注架衣之具橫者曰櫛直

者曰揮以竿為之 邢疏凡以竿為衣架者名箠曲禮
曰男女不同櫛枷謂此也 古樂府還視桁上無懸衣
注桁衣架

巾箱

南史齊時人發桓溫女塚得金巾箱織金篋為嚴器
南史范岫為長城令時有梓材巾箱至數十年經貴遂
不改易 南史宋褚炫在選部時出行左右嘗捧一黃
紙帽箱風吹紙剝殆盡 三餘帖陳宣華有沉香履箱

金屈膝

囊 附被囊 袋 荷包

孫奕示兒編說文曰無底曰囊有底曰橐董氏曰無底
曰橐有底曰囊唐韻曰橐無底囊 周禮男鞶革女鞶
絲鄭注鞶小囊盛悅巾者男用韋女用繒 晉書鞶古
制漢世著鞶囊者側在腰間或謂之傍囊或謂之綬囊
然則以紫囊盛綬也或盛或散各有其時 漢武內傳
帝見西王母巾器中有一卷小書盛以紫錦之囊 詞

林海錯勝囊可帶者漢書製為勝囊 漢外戚傳中黃

門持詔記盛綠綈方底注方底盛書囊形如今之算勝

曹瞞傳操佻易自佩小鞶囊盛手巾細物 晉中經

薄盛書用阜縹囊布裏書函中皆有香囊 東宮舊事

太子納妃有絳石綺絹裏被囊一丹羅長命綺絹裏枕

囊一紫綉文綺絳絹裏枕囊二 晉書八座尚書荷紫

以生紫為袷囊綴之服外加於左肩晉周公負成王制

此服衣至今以為朝服 梁書周捨問劉杳尚書官著

紫荷橐相傳云挈囊竟何所出答曰張安世傳曰持橐
簪筆事孝武皇帝數十年韋昭張晏注並云橐囊也近
臣簪筆以待顧問 錦繡萬花谷梁中丞給威儀十人
其八人武冠絳幘執青儀囊在前 劉義慶啟承賜金
縷琥珀茱萸囊七寶樹裝絹裏副之 酉陽雜俎北朝
婦人夏至日進扇及粉脂囊 續齊諧記弘農鄧紹八
月朝入華山見一童子以五色綵囊盛取柏葉下露云
赤松先生取以明目今八月朝作眼明囊象此也 梁

簡文帝眼明囊賦序俗之婦人八月旦多以錦翠珠寶
為眼明囊因競凌晨取露以拭目 盧公家範凡八月
旦取承露盤赤松子柏上露為囊以膏面皮 續齊諧
記汝南桓景隨費長房遊學累年長房謂曰九月九日
汝家中當有災宜急去令家人各作絳囊盛茱萸以繫
臂登高飲菊花酒此禍可除景如言舉家登山夕還見
雞犬牛羊一時暴死長房聞之曰此可代也今世人九
日登高飲酒婦人帶茱萸囊蓋始於此 隋唐嘉話千

秋節士庶結承露絲囊相遺 姚汝能安祿山事迹天

長節祿山進玉石功德等優詔褒美賜承露囊 清異

錄唐季王侯競作方便囊重錦為之形如今之照袋每

出行雜置衣巾篋鑑香藥詞冊頗為簡快 李賀傳賀

每旦日騎弱馬從小奚奴背古錦囊遇所得書投囊中

博物志鴻毛為囊可以渡江不漏 謝氏詩源更羸

之妻能作鎖雲囊佩之陟高山有雲處不必開囊而自然有雲氣入其中歸至家啟視皆有雲氣白如綿自囊

而出囊大如蠶繭而可以開合 庶物異名疏晉以後
士大夫尚清談喜宴逸始作隱囊其制今不可見按顏
氏家訓云梁朝全盛之時貴遊子弟駕長簷車憑班絲
隱囊急就注云鞞韋囊在車中人所憑伏也今謂之隱
囊

被囊 晉書惠帝及成都王穎單車走洛陽服御分散
倉卒上下無齋侍中黃門被囊中齋私錢三千詔貸用
資暇錄被囊非古製不知孰起也比者遠遊行則用

太和九年以十家之累者遷迤竄謫人人皆不自期常
虞倉卒之遣每出私第咸備四時服用舊以紐帶為腰
囊置於殿乘至是服用既繁乃以被易之成俗於今大
中已來吳人亦結絲為之徒翫而不用也

袋 書叙指南趙后算袋曰算膊 郭思畫論唐高宗

朝一品以下文官帶手中算袋子礪石睿宗朝制武
官五品以上帶佩刀刀子磨石契苾真職厥針筒火石
袋 炙穀子魚袋古之算袋取合魚符之義 盧公家

範凡臘日上藻豆袋 春明退朝錄官誥院敕郡夫人
使金花羅紙七張錦縹袋 珍珠船王太保每天氣和
暖必乘小駟從三四蒼頭攜照袋貯筆硯韻略刀子牋
紙并小樂器之類照袋以烏皮為之四方有益并襪五
代士人多用之 酉陽雜俎元和末有淮西軍將使於
汴州止驛中夜久眠將熟忽覺一物壓已軍將素健驚
起與之角力其物遂退因奪得手中草囊鬼闇中哀祈
甚苦軍將謂曰汝語我物名我當相還鬼良久曰此蓄

氣袋耳軍將乃舉臂擊之語遂絕其囊可盛數升絳色如藕絲攜於日中無影

荷包 名義考晉輿服志文武皆有囊綴綬八座尚書則荷紫乃負荷之荷非荷蕒也今謂囊曰荷包本此

桐薪沈約宋書禮志載尚書令僕射尚書朝服肩上有生紫袷囊綴之朝服外俗呼曰紫荷或云漢代以盛奏事負荷而行未詳也據此則今俗男女雜佩流蘇尚有荷包之稱其沿古朝服製乎名雖不典義有所承事

物紺珠荷包或金銀或纈繡又壓口捺子荷包上用

櫃

稗史類編國語曰夏之衰也褒之神化為二龍夏后布幣而策告之卜藏其蓼吉龍亡而蓼在積韋昭曰積匱也書武王有疾周公作冊納之金匱之匱中蓋積匱一器也夏后謂之積周始謂之匱然則三代之制也韓子楚人賣珠於鄭為木蘭之櫃薰以桂椒綴以珠玉飾以瑰玉緝以翡翠鄭人買其櫃還其珠可謂善賣櫃不

可謂善鬻珠也 杜陽雜編唐武宗會昌初渤海貢馬
腦櫃方三尺深色如茜所製工巧無比用貯神仙之書
置之帳側

簾 附筭 籠

吳語大荒洊饑市無赤米而困鹿空虛註先儒以圓曰
困方曰鹿困聚也亦散也鹿善聚善散故困謂之鹿俗
作簾 東宮舊事太子納妃有漆文金裝衣簾 周顓
傳王敦籍顓家收得數枚素簾盛故絮而已其清約如

此 同話錄雲水人以小竹揉之下為方逢上為方蓋
逢之中置衣食之屬蓋之下藏藥物之屬負之於背以
行名曰避秦此二字班馬書皆載於四皓事處器物因
是以名其源流有如此者

筭 事物原始筭鄭康成曰竹器也用以盛飲食者方
曰筭即今之方食箱也 吳越春秋越以文筭七枚獻
於吳王 庶物異名疏莊子芻狗之未陳也盛以篋衍
篋衍筭也 風俗通靈帝建寧中京師皆以方葦筭為

粧具

籠 方言籠南楚江沔之間謂之箒或謂之箒郭注亦呼為籃 溪蠻叢笑負物不以肩用木為半枷之狀箱其項以布帶或皮繫之額上名背籠

奩匣

博古圖鳳奩獸奩皆有蓋無銘許慎以為鑑觀古人貯物之器多以奩稱不獨為鑑而設昔丁度以為香器意其有得於是考其形方若檻蓋如屋拱一飾以鳳一飾

以獸所飾雖異制度相若又四神奩有蓋無銘蓋起三
羊回頭相向頂間以四神為飾純間為方斜雷紋三足
作熊狀又蟠虬攜奩有蓋無銘是器狀若截甬蓋頂飾
以蟠虬上下純素三足為熊形而耳作獸狀連環龍首
以為提梁魏武上雜物疏御雜物用有純銀澡豆奩
純銀括鏤奩又有銀鏤漆匣四枚杜陽雜編咸通中
同昌公主有翡翠匣積毛羽飾之吳鉞詩玉檢茱萸
匣西京雜記漢時帝及侯王送葬者皆珠襦玉匣匣

上鏤以蛟龍

格致鏡原卷五十四

欽定四庫全書

格致鏡原卷五十五

大學士陳元龍撰

香奩器物類一

簪

說文簪首笄也 史記平原君誇楚為玳瑁簪 西京

雜記武帝過李夫人就取玉簪搔頭自此後宮人搔頭

皆用玉玉價倍貴焉 飛燕外傳帝臨太液池后歌歸

風送遠之曲帝以文犀簪擊玉甌和之 羣書考索東

漢太皇太后皇太后入廟簪以瑇瑁為撻長一尺端為
華勝上為鳳皇爵以翡翠為毛羽下有白珠垂黃金鑷
左右一橫簪之以安箇結諸簪珥皆同制其撻有等級
焉班固與竇憲牋將軍哀憐賜以玉躬所著駮玳瑁
簪班固與弟超書今遺仲升玳瑁黑犀簪江表傳
魏文帝遣使於吳求通犀簪陸翽鄴中記魏文帝陳
巧笑挽髻別無首飾惟用圓頂金簪一隻插之文帝目
曰玄雲黯靄兮金星出北史魏胡太后幸闕口溫水

登雞頭山自射象牙簪一發中之敕示文武 唐書漢
陽公主時戚近爭為奢侈而主獨以儉嘗用鐵簪畫壁
自記田租所入 清異錄吳越孫妃嘗以一物施龍興
寺形如朽木筋僧不以為珍偶出示船上胡人曰此日
本國龍慈簪也增價至萬二千緡易去 王變雜章古
日佳辰誕聖生副奉道天簪二枚 說文笄簪也其端
刻雞形士以骨為之大夫以象為之緡以絃繫笄順頤
下而結之 實錄燧人始為笄女媧之女以荆杖及竹

為笄以貫髮至堯以銅為之且橫貫焉舜雜以象牙玳瑁 中華古今注自古之有髻而吉者繫也女子十五而笄許嫁於人以繫他族故曰髻而吉榛木為笄笄以約髮也居喪以桑木為笄表變孝也皆長尺有二寸沿至夏后以銅為笄於兩旁約髮也謂之髮笄 周禮追師掌王后之首服追衡笄注追治也王后之衡笄以玉為之副配褱揄編配闕鞠次配展緣衡則維持冠而平之也笄則卷髮而節之使平也 禮雜記女雖未許嫁

年二十而笄燕則髻首注燕居則去其笄分髮為髻髻紛
未許嫁故雖已笄猶為少者處之 粧臺記晉惠帝元
康中婦人以金銀玳瑁之屬為笄鉞戈戟以當笄 洪
皓松漠紀聞回鶻以金相瑟瑟為首飾如釵頭形而曲
一二寸如古之笄形 五雜俎笄不獨為女子之飾古
者男子皆戴之按三禮圖笄士以骨大夫以象蓋即今
之簪耳左傳范武子怒文子擊之以杖折其委笄蓋文
子為童子未冠時也 北史王肅之奔魏也劉芳未及

相見嘗宴羣臣於華林肅語次云古者唯婦人有笄男子則無笄芳曰推經禮正文古者男子婦人俱有笄肅曰喪服稱男子免而婦人髻男子冠而婦人笄如此則男子不應有笄芳曰此專謂凶事也內則稱子事父母雞初鳴櫛纚笄總以茲而言男子有笄明矣儀禮士冠禮皮弁笄鄭注笄今之簪有笄者屈組為紘垂為飾士冠禮設笄注凡諸侯笄有二一是紒內安髮之笄一是皮弁釁弁及六冕固冠之笄

釵

劉熙釋名釵枝也因形名之也爵釵者釵頭及上施爵也 中華古今注釵予蓋古笄之遺像也至秦穆公以象牙為之敬王以玳瑁為之始皇又金銀作鳳頭以玳瑁為腳號曰鳳釵 洞冥記漢武元鼎元年起招仙閣有一神女留玉釵與帝帝以賜趙婕妤至昭帝元鳳中宮人猶見此釵謀欲碎之開視匣惟見白燕直升天後宮嘗作玉釵因名玉燕釵言其吉祥 西京雜記合德

遺飛燕同心七寶釵 飛燕外傳趙后持昭儀手袖紫
玉九雛釵為昭儀簪髻 後漢書貴人助簪玳瑁釵

廣博物志盤龍釵梁冀婦所制 薛靈芸傳靈芸改名

為夜來入宮承寵愛外國獻火珠龍鸞之釵帝曰明珠
翡翠尚不勝況乎龍鳳之重乃止而不進 晉令六品

以下得服金釵以蔽髻三品以上服爵釵 中華古今

注東晉有童謠言織女死時人插白骨釵子白粧為織

女作孝 粧臺記煬帝令宮人插翡翠釵 中華古今

注隋煬帝宮人插鈿頭釵子常以端午日賜百寮玳瑁
釵冠 杜陽雜編咸通中同昌公主有九玉釵上刻九
鸞皆九色上有字曰玉兒工巧妙麗殆非人工所製一
日晝寢夢絳衣奴授語云南齊潘淑妃取九鸞釵及覺
具以夢中之言言於左右洎公主薨其釵亦亡其處

杜陽編代宗大歷中日林國獻龍角釵釵頭玉紺色上
刻蛟龍之形精巧奇麗非人所製帝賜獨孤妃子與帝
同汎舟於龍池有紫雲自釵上而生俄頃滿於舟中帝

由是命置之於掌內以水噴之化為一龍騰空東去

五行志唐末世俗尚以琉璃為釵釧近服妖也流離播遷之兆 演繁露金釵十二行乃排插十二釵也唐制

命婦以花樹多少為高下曰花釵若干也 留青日札

古樂府河中曲詠莫愁頭上金釵十二行足下絲履五

文章後人不解遂誤以為金釵美人十二行殊不知古

婦人髻高故能插金釵十二行乃六雙也 裴淵廣州

記南海豪富女子以金銀為大釵執以扣銅鼓故號為

銅鼓釵 華陽國志涪陵山有大龜其甲可卜其緣可作釵世號靈釵

玉導

丹鉛總錄玉導者玉簪或冠篋之類導擇也義取擇髮然自唐以後不聞其名 釋名導所以導擽音力擽也髮使

入巾幘之裏也 名義考周禮天子以玉笄而導亦如之梁沙門法雲謂周舍曰檀越既能戴纛貧道何為不執鍤段公路云通天犀堪為釵纛纛與導同音一物也

按隋禮儀云簪所以建髮於冠導所以櫟髮於巾幘之裏說文篋導也簪即笄釵岐笄導即櫟整髮釵篋亦以整髮即今掠子導即今引子以角為之櫟髮入幘故名引古名導今名引其義一也纛羽葆幢所以引行故又借為纛俗呼轉為敏音俗書作剛字於是引之義晦而導纛不復知為何物矣餘冬丹鉛二錄雖嘗置辨亦未明的 士燮集遣功曹使貢皇太子通天犀導 南史主衣中有玉介導齊高祖以其長奢侈之源命打破之

續齊諧記東海蔣潛得通天犀導後落褚太宰處褚以
餉齊故丞相豫章王王死後內人江夫人斷以為釵每
夜輒見一兒繞牀頭啼叫云何為見屠割必當相報終
不獨受枉酷江夫人惡之月餘遂薨北史魏晉以來
皮弁有纓而無笄導何稠曰此古田獵服也今服以入
朝宜變其制故弁施象牙簪導自稠始也

金鈿

古今注紂作金鈿六書故金華為飾田田然故曰鈿

東宮舊事太子納妃有同心雀鈿一具

翠翹

山堂肆考翡翠鳥尾上長毛曰翹故美人首飾如之因
名翠翹唐詩頭上駕釵雙翠翹 蜀中詩話張泌江城
子詞金簇小蜻蜓按小蜻蜓之飾正所謂翹兒花也
丹鉛錄蜀之妓女有花翹之飾名曰翹兒花

步搖

逸雅步搖上有垂珠步則搖也 採蘭雜志人謂步搖

為女髻非也蓋以銀絲宛轉屈曲作花枝插髻後隨步
輒搖以增媚媚故曰步搖 釋名皇后首飾曰副副覆
也亦言副貳兼用衆物成其飾上有垂珠步搖 古今
注殷后服盤龍步搖梳流蘇珠翠三服服龍盤步搖若
侍去流蘇以其步步而搖故曰步搖 二儀實錄燧人
氏婦人始束髮為髻舜加以首飾文王又加翠翹步搖
也 西京雜記合德遺飛燕黃金步搖 江表傳孫皓
使尚方以金作步搖假髻千數令宮人著以相撲朝成

夕敗輒命更作 晉書皇后首飾則假髻步搖俗謂之珠松是也簪珥步搖以黃金為山題貫白珠為桂枝相繆八爵九華熊獸赤羆天鹿辟邪南山豐大特六獸諸爵獸皆以翡翠為毛羽金題白珠璫繞以翡翠為華

東宮舊事皇太子納妃有步搖一具九鈿函盛之 粧

臺記天寶初貴族及士民好為胡服胡帽婦人則簪步

搖釵 楊妃外傳天寶四載七月於鳳皇園冊太真宮

女道士楊氏為貴妃半后服用進見之日奏霓裳羽衣

曲上自執麗水鎮庫紫磨金琢成步搖至妝閣親與插
髮

綵勝

事物原始實錄曰晉惠帝令宮人插五色通草花漢王
符潛夫論已譏花采之費晉新野君傳家以剪花為業
染絹為芙蓉捻蠟為菱藕剪梅若生之事按此則是花
采起於漢剪綵起於晉矣 物原五采通草花呂后制
綵花晉郭隗制 荆楚歲時記正月七日鏤金箔為人

勝以貼屏風亦戴之頭鬢又造華勝以相遺立春之日
悉剪綵為鶯以戴之注綵鶯即合歡羅勝鄭毅夫詩漢
殿鬪簪雙綵鶯併知春色上釵頭 司馬相如大人賦
覩西王母曷然白首戴勝而穴處兮師古注勝新婦首
飾也漢代謂之華勝 續漢書輿服志太后入廟戴花
勝上為鳳皇爵以翡翠為毛羽下有玉珠垂黃金鑷左
右各一橫簪之 杜詩注人日造華勝相遺起於晉代
見賈充李夫人典戒云像瑞圖金勝之形又像西王母

戴勝也 晉中興書孝武時湯穀氏得金勝一枚長五寸形如織勝 歲時記劉臻妻陳氏進見儀人日上人勝於人 酉陽雜俎北朝婦人立春日進春書以青綵為幟刻龍像銜之或為蝦蟇 文昌雜錄唐制立春賜三省官綵勝各有差 景龍文館記景龍四年七月宴大明殿賜王公以下綵縷人勝 夢華錄立春日自郎官御史寺監長貳以上皆賜春幡勝以羅為之宰執親王近臣皆賜金銀幡勝入賀訖戴歸私第 夢華錄立

秋日京城滿街賣楸葉婦女兒童爭買剪成花朵戴之
圖經夔州人以人日傾城出入陣磧上謂之踏磧婦
人拾小石之可穿者貫以綵索繫於釵頭以為一歲之
祥周祈名義考北俗元日剪烏金紙翩翩若飛翔之
狀簪之謂之黑老婆按元日剪綵為燕戴之曹松詩綵
燕表年春王沂公帖子彩燕迎春入鬢飛燕為玄鳥遺
卵生契故後人目為黑老婆即彩燕之遺也

花子

古今注始皇令宮人梳仙髻帖五色花子畫為雲鳳至
東晉有童謠云織女死人帖草油花子為織女作孝至
後周又詔宮人帖五色雲母花子作碎粧以侍宴如供
奉者帖勝花子作桃花粧 妝臺記花子彷彿於壽陽公
主梅花落面事也宋淳化間京師婦女競剪黑光紙團
壓又裝縷魚腮骨號魚媚子以飾面皆花子之類 珍
玩考江南晚季建陽進茶油花子大小形製各別極可
愛宮嬪縷金於面皆以此花餅施於額上時號北苑粧

耳環

留青日札女子穿耳帶以耳環自古有之乃賤者之事
莊子曰天子之侍御不揃爪不穿耳杜子美詩玉環穿
耳誰家女諸葛恪曰母之於女天性之愛穿耳貫珠何
傷於仁 輟耕錄或者謂晉唐間人所畫士女多不帶
耳環以為古無穿耳者然莊子曰天子之侍御不穿耳
自古亦有之矣 逸雅穿耳施珠曰璫此本出於蠻中
所為也婦女輕淫好走故以此琅璫錘之 西京雜記

合德遺飛燕合歡圓璫 續漢書皇太后皇后入太廟
服紺上卑下蠶青上縹下隱簪珥珥璫垂珠也 晉令
士卒百工不得服真珠璫珥 雲烟過眼錄趙孟頫所
藏有雙荔枝女環一對可長三寸並脚通碾皆白玉也
甚精此必太真后妃故物也 周書武王伐紂商師大
崩帝辛登廩臺取天知玉珥以自焚在火中不銷 松
漠紀聞曰鵲善結金線相瑟瑟為珥 漢書平后傳世
子祿飾師古注首飾在兩耳後刻鏤為之

指環

物原紂作寶幹指環 廣韻鑲指鑲也以金鍍之曰鍍

鑲 三餘贅筆世俗用金銀為環置於婦人指間謂之

戒指按詩注古者后妃羣妾以禮進御於君女史書其

月日授之以環以進退之生子月辰以金鑲退之當御

者以銀環進之著於左手既御者著於右手事無大小

記以成法則世俗之名戒指者有自來矣 賢奕編戒

指又云手記 西京雜記戚姬以百鍊金為彊環照見

指骨上惡之以賜侍兒鳴玉耀光等各四枚 西京雜

記合德遺飛燕瑪瑙彊 漢舊儀宮人御幸賜銀指環

拾遺記吳王潘夫人酣醉唾於玉壺中使侍婢瀉於

臺下得火齊指環即挂石榴枝上因其處築臺名曰環

榴臺時有諫者云今吳蜀爭雄環榴之名將為妖乎孫

權乃翻其名為榴環臺 俗說晉哀帝王皇后有一紫

磨金指環至小止可第五指帶 南史天竺迦毘黎國

元嘉中表獻金剛指環摩勒金環諸寶物 雲溪友議

韋皋遊江夏姜使君館有小青衣曰玉簫遺以白玉指
環妝臺記何充妓於後閣以翡翠指環換刺繡筆充
知歎曰此物洞仙與吾欲保長年之好乃令蒼頭急以
蜻蜓帽贖之胡俗傳始結婚姻相然許者便下金同
心指環稗史類編嘗有戒指嵌馬腦一塊面上碾成
十二支生屬其紋細如髮似非人工故謂之鬼功石又
名鬼國石

釧
附諸套飾

事物紺珠釧手鐲釵以金玉為之 徐炬事物原始風俗通曰釧臂環也即今婦女之臂鐲 事林廣記通俗文云環臂謂之釧後漢孫程十九人立順帝有功各賜金釧指環則釧起於後漢 南齊書東昏侯為潘妃作琥珀釧一隻直七十萬 盧氏雜記唐文宗一日問宰臣古詩云輕衫襯跳脫跳脫是何物宰臣未對上曰即今之腕釧也真誥言安妃有斲粟金跳脫是臂飾 枕譚條脫臂飾也一作條達又作跳脫蓋傳寫之誤也

真誥萼綠華贈羊權金玉條脫各一枚 能改齋漫錄
按周處風土記云仲夏造百索繫臂又有條達等織組
雜物以相贈遺唐徐堅初學記引古詩云繞臂雙條達
則條達之為釧必矣第以達為脫不知又何謂也徐堅
所引古詩乃後漢繁欽定情篇云何以致契闊繞腕雙
條脫但腕臂兩字不同 元氏掖庭記元后靜懿皇后
誕日南朝宮人有選入後庭者獻柳金簡翠腕闌似今
之手鐲類但扁而用於臂者耳 明皇雜錄玄宗曰我

祖破高麗獲紅粟玉臂支朕以岐王初進龍池篇以玉
臂支賜妃子妃子後以賜阿蠻 夢溪筆談金陵人登
六朝陵寢得玉臂支兩頭施轉可以屈伸今圓近於無
縫為九龍統之功侔鬼神

諸奩飾 留青日札荀子曰處女嬰寶珠即今珠纓絡
也一名珠落索說文嬰頸飾也胡人連貝飾頸曰嬰普
門品經無盡意菩薩解頸下衆寶珠瓔珞以與之三禮
圖珠瓔翠綫左傳玉纓杜詩真珠絡臂鞵 放懷集杜

甫每朋友至引見妻子韋侍御見而退使其婦送夜飛
蟬以助妝飾事物紺珠金訶子貴妃私祿山因為其
爪傷胷乳間遂作金訶子蔽之東坡詩自注於潛婦
女皆插大銀櫛長尺許謂之蓬沓丹鉛總錄馬融廣
成頌金鍍玉環今婦飾曰環嵌生括當用此環字俗作
廂非

粉

逸雅紅粉紅赤也染粉使赤以著頰上也胡粉胡餬也

脂和以塗面也

採蘭雜志粉神曰子占 墨子禹作

粉 博物志紂燒鉛作粉謂之胡粉 古今注自三代

以鉛為粉秦穆公女弄玉有容德感仙人蕭史為燒水

銀作粉與塗亦名飛雲丹 疑耀古今實錄據蕭史事

謂婦人傅粉自秦始或曰周文王時婦人已傅粉矣非

始於秦也 飛燕外傳趙婕妤傅露華百英粉 傅芳

略記周光祿諸妓傅面用龍消粉 水經注江州縣下

清水穴巴人以此水為粉則皜曜鮮芳貢粉京師因名

粉水故世謂之江州墮林粉 地理志房陵有清泉土
人以為粉則膏澤芳潤 荊州記范陽縣有粉水取其
水以為粉今謂之粉口 庶物異名疏鮮錫粉飾名見
神農本草 石藥爾雅粉一名流丹白豪

黛

逸雅黛代也滅眉毛去之以此畫代其處也 採蘭雜
志黛神曰天軼 妝臺記漢日給宮人螺子黛 隋遺
錄殿脚女爭効為長蛾眉司宮吏日給螺子黛五斛號

為蛾綠螺子黛出波斯國每顆直十金後徵賦不足雜
以銅黛給之獨絳仙得賜螺黛不絕 張端義貴耳集
粉白黛黑戰國策張儀曰鄭周之女粉白黛黑注曰明
光宮發燕趙美女二十人充之皆自然美麗不使粉白
黛黑又楚辭大招曰粉白黛黑施芳澤只惟韓文公送
李愿盤谷序乃云粉白黛綠東坡荅王定國書粉白黛
綠者係尹夾宅中狐狸射干之流願以道眼看破方變
黑為綠字

燕脂

逸雅脂砥也著面柔滑如砥石也脣脂以丹作之象脣赤也採蘭雜志脂神曰與贅演繁露古者婦人粧飾欲紅則塗朱欲白則傅粉故曰施朱太赤施粉太白此時未有胭脂故但施朱為紅也胭脂出自虜地古今注燕脂蓋起自紂以紅藍花汁凝作燕脂以燕國所生故曰燕脂塗之作桃紅粧習鑿齒與燕王書山下有紅藍足下先知否北方人採取其花染緋黃採取其

上英鮮者作胭脂婦人用為顏色今始知為紅藍後當
致其種 竹坡詩話古今注云燕支出西方土人以染
中國謂之紅藍以染粉為婦人面色而俗乃用胭脂或
臘脂字不知其何義也 升菴外集燕支今人以重絳
為之 庶物異名疏均藻云靨霜脂粉也見仙人王予
可詩又海篇玉鑑煙枝婦人面飾 五雜組以丹注面
曰的古天子諸侯媵妾以次進御有月事者難以口說
故注此於面以為識如射之有的也後遂為兩腮之飾

卿嬖記薛夜來初入魏宮一夕面觸水晶屏上傷處
如曉霞將散自是宮人俱用臘脂倣畫曉霞粧 唐百
官志中尚署臘日獻口脂面脂頭膏 酉陽雜俎臘日
賜北門學士口脂臘脂盛以碧鏤牙筩 太平御覽盧
公家範凡臘日上澡豆及頭膏面脂口脂 梁谿漫志
老泉贊吳道子畫五星云妝非今人脣傅黑膏予嘗疑
霄漢星辰之尊而粧飾乃如是之妖何也及觀唐五行
志元和末婦人為圓髻椎髻不設鬢飾不施朱粉惟以

烏膏注脣狀若悲啼乃悟唐之俗工作時世妝嫁名道
子以給流俗星辰不如是也

香澤

小雅豈無膏沐注膏所以澤髮 採蘭雜志膏神曰雁
孃 逸雅香澤者人髮恒枯悴以此濡澤之也 丹鉛
總錄崔寔四民月令有合香澤法清酒浸雞舌藿香首
宿蘭香四種以新綿裹浸胡麻油和猪脂納銅鐺中沸
定下少許青蒿以發綿罍鐺腎餅口瀉之梁簡文帝樂

府八月香油好煎澤元魏孝文帝詔煎御香澤須錢萬貫帝以軍旅在外停之梁書三佛齊國志以濃而無滓者為上蘇合是合諸香汁煎之非自然一物也又云大秦人採蘇合先榨其汁以為香膏乃賣其滓與諸國賈人是以展轉來達中國不大香也香譜蘇合香油亦出大食國氣味大抵類篤耨紀談錄玫瑰油出北地其色瑩白其香芬馥不可名狀北人貴重之傳芳略記周光祿諸妓掠髮用鬱金油文昌雜錄禮部王

員外言今謂面油為玉龍膏太宗皇帝始合此藥以白
玉碾龍合子貯之因以名焉

梳 附 梳 刷

說文櫛梳枇總名也 釋名梳言其齒疎也枇言其相
比也 蒼頡篇靡者為比麤者為梳 玉藻櫛用櫛櫛
注既沐髮濕則滑故用木梳 稗史類編古者尚沐故
治髮之具櫛而已玉藻曰沐稷而醑梁櫛用櫛櫛髮晞
用象櫛如比然櫛已有比之義詩云其比如櫛箋謂相

近迫也至漢書所言比疎則視櫛櫛為加密矣然非今之比疎也注以為編髮之飾則今女子首飾所著金翠珍異之梳耳後世憚數沐而櫛用以為去垢之具則與漢之所言比疎名雖同而實又異也 二儀實錄赫胥氏造梳以木為之二十四齒取梳通之義 物原伏羲作木梳 急就章注吳主亮夫人洛珍有櫛名玉雲

晉東宮舊事太子納妃有璚瑁梳三枚象牙梳三枚

李肇翰林志翰林學士給大小象梳

郭滉高力士傳

力士於太宗陵寢宮見小梳箱一柞木梳一歎曰先帝
首建義旗新正皇極十有餘載方致昇平隨身服用唯
留此物將欲傳示孝孫永存節儉具以奏聞 清異錄
洛陽少年崔瑜卿多貲善游冶嘗為倡女玉潤子造綠
象牙五色梳費錢近二十萬 樵人直說孫思邈以交
加木造百齒梳用之養生祕法也 格古論鶴頂出南
番大海中有魚頂中魷紅如血故名鶴魚今用龜筒夾
鶴魚魷為梳故名鶴頂梳 奚囊橘袖麗居孫亮愛姬

也鬢髮香淨一生不用洛成疑其有辟塵犀釵子也洛成即今篦梳清異錄脩養家謂梳為木齒丹法用奴婢細意者執梳理髮無數日愈多愈神廣博物志郎當淨櫛器也事物紺珠梳匣呂望作

篦物原神農作篦筐庶物異名疏詩疏以象骨搔首因以為飾名之曰櫛故云所以摘髮玉璵考云象櫛若今之篦子然觀魏風佩其象櫛蓋男女通用乃佩於身以備剔髮之垢也高力士傳太宗陵寢宮有黑角

筓一 翰林志翰林學士給象筓 清異錄筓誠瑣縷物也然丈夫整鬢婦人作眉捨此無以代之余名之曰

鬢師眉匠

刷 逸雅刷帥也帥髮長短皆令上從也亦言瑟也刷髮令上瑟然也 物原伊尹作油刷少康作掠子 嵇

康養生論勁刷理髮僅乃得之 東宮舊事太子納妃

有漆畫猪鬃刷大小三枚 高力士傳太宗梳箱有草

根刷子一 三餘帖豪犀刷鬢器也唐詩側釵移袖拂

豪犀

香囊

爾雅婦人之褱謂之縞縞縞也注即今之香縵也褱邪
交落帶繫於體因名為褱縵繫也 禮內則縵衿佩容
臭注容臭香物也助其形容之飾以縵繫之 南史麝
膯注今之香袋 繫欽定情詩何以致叩叩香囊繫肘
後 晉書謝玄嘗佩紫羅香囊叔安患之而不欲傷其
意因戲賭取焚之 鄴中記石虎造流蘇斗帳上安金

蓮花花中懸金箔盛腕囊盛以異香 珍珠船楊妃初

瘞以紫褥裹之及移葬肌膚已消釋矣冑前猶有錦香

囊在中官葬畢以獻上皇置之懷袖 杜陽編同昌公

主乘七寶步輦四面綴五色玉香囊囊中貯辟寒香辟

邪香瑞麟香皆異國所獻也仍雜以龍腦金屑刻鏤水

晶瑪瑙辟塵犀為龍鳳花其上仍絡以真珠玳瑁文金

絲為流蘇雕玉為浮動每一出遊則芬馥滿路熒晶照

灼觀者眩目 唐六典中尚署臘日進衣香囊 韓偓

傳臘日賜繡香袋一枚 皇甫放非烟傳步非烟授趙
象以連蟬錦香囊象結香囊于懷

帨

物原軒轅作帨巾祖甲作帨 禮內則左佩紛帨注紛
以拭器帨以拭手 說略巾本佩巾禮左佩紛帨是也
帨拭物之巾詩無感我帨兮即今之手巾汗巾也 瀛
涯勝覽古俚國有色絲間花帨闊五尺長一丈三二尺
直金錢百文 禮玉藻浴用二巾上絺下綌 事物原

始王莽篡漢漢王閔伏地而泣元后親以手巾拭其淚巾雖始於三代而手巾之名實始於漢今稱曰幌是也秦嘉婦與嘉書今奉越布手巾二枚 志怪會稽吳

詳者少為縣吏夜行至溪見一女子溪邊洗脚呼詳共宿明旦別去女贈詳以紫布手巾詳荅以白布手巾

蘇鶚杜陽雜編咸通中同昌公主有紋布巾即手巾也潔白如雪光軟特異拭水不濡用之彌年不生垢膩云得之鬼谷國 翰林志翰林學士給白布手巾 南史

海中自然大洲其上有樹生火中洲左近人剝取其皮
紡績作布以為手巾與蕉麻無異而色微青黑若小垢
汚則投火中復更精潔或作燈炷用之不盡

帕

東宮舊事皇太子納妃有絳綾裏帕五 李肇翰林志
翰林學士給青綾單帕 六書故宋仁宗時有紫帕為
油所漬其色近玄因命染人倣而為之謂之油紫今四
品以上朝服用此其染之以紫草色近玄昔之紫近絳

亂朱者此紫也 麗情集賈知微遇曾城夫人杜蘭香
以秋雲羅帕裏丹五十粒與生曰此羅是織女練玉璽
織成遇雷雨時密藏之後大雷雨失帕所在 解醒語
元成宗諸嬪臂繫秋雲紫條帕

格致鏡原卷五十五

欽定四庫全書

格致鏡原卷五十六

大學士陳元龍撰

香奩器物類二

鏡 附鏡臺 鏡奩

總論 逸雅鏡景也言有光景也 韓子古之人目短
於自見故以鏡觀面 稗史類編玄中記曰尹壽堯臣
也作鏡黃帝內傳曰既與王母會於王屋乃鑄大鏡十
二面隨月用之則鏡蓋肇於軒轅非尹氏始作也 宣

和博古圖昔黃帝液金作神物為鑑凡十有五去古既遠不能盡攷後世有得其一者其制度以四靈位四方以八卦定八極十二辰環其外二十四氣布其中故與日月合明鬼神通意周治鑑之數十有三蓋體閏月也以十二投十二野其一則為鎮於中州漢以後形制各異園者規天方者法地六出象其物八方定其位左右上下則有四靈錯綜經緯則有五星具一日之數則載之以十二辰具一歲之數則載之以十二月周其天者

有二十八宿拱其位者有三神八衛或中虛而謂之夾
鑑或形蛻而名以浮水或龍蟠其上或鳳飾其後或為
花卉羽毛鱗甲之屬或為嘉禾合璧比目連理之狀或
象玉女之起舞或肖五嶽之真形

鑑鏡別名

淮南子明鏡

之始型朦然及粉之以玄錫劇之以白旃則鬚眉鬢毛
可得而察 王度古鏡記胡僧云古鏡以金膏塗之珠
粉拭之以照日必影徹牆壁又造金烟薰之玉水洗之
藏之泥中亦不晦矣 抱朴子或問知將來吉凶為有

道乎答曰用鏡九寸自照有所思存七日則知神仙千里事也明鏡用一或二謂之日月或用四謂之四規鏡搜神記王獻失鏡鏡在罌中罌繞數寸而鏡尺餘以問郭璞曰此乃邪魅所為使燒車轄以擬鏡鏡即出焉神異經昔有夫婦相別破鏡人各執半以為信其妻與人通鏡化鵲飛至夫前夫乃知之後人因鑄鏡為鵲安背上自此始也後山談叢驗鏡視其鼻鼻滑淨如削者古今人謂之有高下今人鑄鐵鏡陷銅為面故明

谷泰博物要覽鏡有秦陀光背質厚無紋極有受用
次如銀背海獸蒲桃荔枝五嶽圖形十二生肖寶花雲
龍十二符四靈三瑞三神八衛六花浮水七乳四乳十
六花蟠螭龍鳳雉馬等俱妙須要清瑩如水面無打攪
輪轉周員形影不改為貴又有如錢小鏡光背花背滿
背嵌金嵌銀片子鏤花小鏡更可人意評者謂徑尺大
鏡及三寸以上及如錢小鏡為上格五六寸者次之菱
花八角又次之方鏡最下者也 稗史類編俗以鏡臍

懸玉籤但知為美觀至銅滑綠處兩強不能相下以致千載傳世出土之物古色一旦磨盪壞之有餘 正字

通鏡鏽鏡上綠也俗名楊妃垢 清異錄有刁蕭者攜

一鏡色碧體瑩背有字曰碧金仙大中元年十二月銅坊長老白九峯造余以俸粒五石換之置於文瑞堂呼

為銅此君 物名要覽司空圖謂鏡為容成侯又曰壽

光先生名金炯 清異錄會昌嘗引照戲令宮嬪離合

鏡字以光音王奏帝曰鏡子封王耶 山堂肆考唐詩

花沒梵輪前梵輪佛鏡也又曰仙輪 曲洧舊聞王建
集有鏡聽詞謂懷鏡於通衢間聽往來之言以占休咎
近世人懷杓今謂之打卦以聽亦猶是也

古鏡 古鏡記隋汾陰侯生贈王度古鏡橫徑八寸鼻
作麒麟蹲伏之象遶鼻列四方龜龍鳳虎依方陳布四
方外又設八卦卦外置十二辰位而具畜焉辰畜之外
又置二十四字周遶輪廓文體似隸點畫無缺而非字
書所有也侯生云二十四氣之象形承日照之則背上

文畫墨入影內纖毫無失舉而扣之清音徐引竟日方絕侯生又云吾聞黃帝鑄十五鏡其第一橫徑一尺五寸法滿月之數也以其相差各校一寸此第八鏡也

鄭還古博異志唐天寶中陳仲躬於洛陽清化里假居一宅宅有井鄰女來汲水忽墮井仲躬間乃窺於井上見水影中一女子面歎曰斯乃溺人之由也忽一日清旦有人扣門云敬元穎請謁命入乃井中所見者仲躬訊之曰卿何以殺人元穎曰妾非殺人者此井有毒龍

自漢朝絳侯居於茲遂穿此井洛城內有五毒龍此其一也龍好食人血自漢已來已殺三千七百人矣妾乃國初方墮於井遂為龍所驅使為妖惑以誘人用供龍所食非妾心所願昨夜子時龍已往朝太乙使者三數日方回君子命匠淘之則妾獲脫難矣願與君子一生奉養言訖便失所在仲躬乃命匠入井淘之至底得古銅鏡一枚面闊七寸八分仲躬令洗淨安匣中一更後忽見元穎自門而入直造燭前拜謝曰某本師曠所鑄

十二鏡之第七者貞觀中為許敬宗婢蘭苔所墮以此井水深兼為毒龍氣所苦人入者輒悶絕而不可取遂為毒龍所役幸遇君子乃獲重見人間其鏡皆蝌蚪書上環書一字管天文一宿依方列之則左有日而右有月龜龍虎雀並依方安焉於鼻中題曰夷則之鏡 博

古圖漢有十二辰鑑四神鑑三神鑑神人鑑神像鑑神

人三獸鑑

以上有銘

百神鑑四神鑑四靈鑑四靈三瑞鑑三

神八衛鑑六花水浮鑑

以上無銘

冊禮鑑尚方鑑長生鑑仙

人不老鑑青蓋鑑服羌鑑函頌周商鑑始青鑑清白鑑

清明鑑宜君公鑑宜官鑑尚方宜子孫鑑長宜子孫鑑

四宜鑑九子鑑宜侯王鑑十六花鑑以上有銘百乳鑑七乳

鑑四乳鑑素乳鑑以上有銘蟠螭鑑有銘龍鳳鑑龍鵲鑑以上有銘

鸞龍鑑有銘虎龍鑑雙鳳鑑鳳馬鑑雉馬鑑龍麟鑑六花

鑑以上有銘海獸鑑有銘海馬蒲萄鑑海貝方鑑海獸朱鳳鑑

海馬狻猊鑑純素鑑以上有銘潛確類書舞鏡有柄李氏

錄曰漢武帝時舞人所執鏡也西京雜記宣帝被收

繫郡邸獄臂上猶帶史良娣合綵婉轉絲繩繫身毒國
寶鏡一枚大如八銖錢舊傳此鏡見妖魅得佩之者為
天神所福故宣帝從危獲濟及即大位每持此鏡感咽
移辰常以琥珀筭盛之 魏書武帝有菱花鏡 陸機
與弟雲書仁壽殿前有大方銅鏡鏡高五尺餘廣三尺
二寸暗立著庭中向之便寫人形體了了 晉東宮舊
事皇太子納妃有著衣大鏡尺八寸銀華小鏡一尺二
寸並衣紐自副漆奩盛蓋銀華金薄鏡三銀龍頭受福

蓮花鈕鑲自副 鄴中記石季龍三臺及內宮中鏡有

二三尺者下有純金龍盤雕飾 南史綦母珍之有一
銅鏡背有三公字嘗語人曰徵祥如此何患三公不至

江總方鏡銘此鏡以照著衣鏡皆圖刻八卦二十八

宿仁壽殿前無以加斯雕麗也 博古圖唐有十二辰

鑑五嶽真形鑑萬春鑑瑩寶鑑武德鑑長宜子孫鑑

以上

有銘龍鑑雲龍鑑雲龍八花鑑雲龍花雀鑑鸞鳳鑑舞鳳

拔猊鑑蓮鳳鑑鳳銜花鑑鹿鳳蒲萄鑑象鑑饗饗鑑

以上

無銘瑞圖鑑

有銘

寶花鑑海獸鑑海獸蒲萄鑑

唐書高馮

為吏侍銓綜平允太宗賜金背鏡一面以表精鑒朝

野僉載中宗令揚州造方丈鏡鑄銅為桂樹金花銀葉

帝每騎馬自照人馬並在鏡中張舜民畫墁錄吾家

舊畜鏡傳為楊妃故物徑尺許厚七分背文精古有銘

其略曰粉壁交映珠簾對看潛窺聖淑麗則常端聖淑

字各少空有並后之象明皇八月五日生也始制誕節

名千秋藩鎮進鏡若紫絲承露囊此幾是耶酉陽雜

組元和初海陵夏侯乙庭前生百合花大於常數倍異
之因發其下得甕匣十三重各匣一鏡第七者光不蝕
照日光環一丈其餘規銅而已 廖瑩中江行雜錄元
相國之鎮江夏也嘗秋夕登黃鶴樓遙望江濱有光若
殘星乃令親信至江所詢彼漁云適獲一鯉親信乃攜
鯉而來命庖人剖之腹中得古鏡二如古錢大以面相
合背則隱起雙龍雖小而鱗鬣髯爪悉具既磨瑩則常
有光耀公寶之置巾箱中及相國薨鏡亦亡去 清異

錄開運既私寵馮夫人其事猶秘會高祖御器用有玉
平脫雙蒲萄鏡乃高祖所愛帝初即位舉以賜馮樵
牧閒談孟蜀時軍校張敵得一古鏡模闊尺餘鏡光照
寢處不施燈燭自得鏡後並無疾病珍珠船徐鉉得
一鏡照面只見一眼宋史泰寧縣耕夫得鏡厚三寸
徑尺有二寸照見水底與月爭輝病熱者得之心骨生
寒故名生寒鏡太平清話范文正公家古鏡背具十
二時如博棊子每至此時則博棊中明如月循環不休

夢溪筆談世有透光鏡背有銘文二十字以鏡承日光則銘文二十字皆透在屋壁上分了分明 餘冬序錄透光鏡日中映之鏡背上文字花樣盡存影中宋沈括筆談載以為奇金麻知幾賦透光鏡詩見中州集皆莫能明其理元吾子行云鏡對日射影於壁鏡背文藻影中一一皆見磨之愈明蓋是銅有清濁之故鏡背鑄作盤龍亦於鏡面竅刻作龍如背所狀復以稍濁之銅填補鑄入削平鏡面加鉛其上舉以向日影光相射隨

銅清濁分明暗也吾子行自謂親見人碎此鏡者如其
言云雲烟過眼錄趙德潤藏鏡杏葉樣背有大鐵環
迺掛鏡也上有銘云人有一口前牛無八角牛口走殊
不可曉下有一牛轉頭前有草一叢下篆辟崇驅邪兩
旁亦有字細考之乃丙午造三字其下牛與草必寓年
號耳白六帖有烏鵲鏡譚子化書小人常有四鏡
一名圭一名珠一名砥一名孟圭視者大珠視者小砥
視者正孟視者倒

異鏡

西京雜記咸陽宮有方鏡廣四尺高五尺九寸

人直來照之影則倒見以手捫心見五臟歷然宮人有邪心則膽張心動一名倒影鏡 酉陽雜俎僊溪石岸

石窟有方鏡徑丈餘照人五臟秦皇世號為照骨寶在無勞縣山境 李潛松窗雜錄太尉李衛國公長慶中在浙右有漁人於秦淮垂機網下深處覺有異物極力舉之得一鏡照之歷歷見五臟六腑因驚懼失墜公聞之萬計窮索於水底終不復得 稗史類編會稽鏡湖

崇寧間漁人夜引網罟覺甚重強加挽拽竟不能舉乃
召集同輩合力久而方升乃一大古鏡方五六尺厚五
寸形模奇怪持以鑑形于昏闇中腸胃肝膈皆洞見置
之舟內欲明日齎詣越府貨於市忽鏗然有聲光采炫
晃湖水如晝俄頃復躍於波心風激浪涌移時始定

梁四公記昔波羅尼斯國王有大福得獲二寶鏡鏡光
所照大者三十里小者十里至裔孫福盡天火燒宮大
鏡光明能禦災火不至焚蕪小鏡光微為火所害雖光

彩昧暗尚能辟諸毒物 陳邦禮寶鏡記萊州呂肚集
張氏築土垣掘得一鏡徑可二尺光明不蝕照之四方
各見百五十里市井人物歷歷具體衆爭欲得之不覺
墮地而碎 談苑 呂文穆公蒙正為相有朝士藏古鏡
能照二百里欲因弟獻以求知公曰吾面不過標子大
安用照二百里聞者歎服以為賢於李衛公遠矣 元
遺山集陽曲劉氏家大寶鏡能照天地四方前知休咎
抱朴子有道士以明鏡九寸懸於背老魅不敢近若

有鳥獸邪物照之其本形皆現鏡中 寶鏡記陸安州
有湖介於無為之間漁者日以千計一日有漁父網得
鏡如盤照見衆漁大半牛馬異形或角或翼若虎若螭
其狀不一而足懼投於水鏡躍四五丈乃沒更求之不
復可得識者云此三生鏡也 事物紺珠六鼻鏡南唐
王氏物常生雲烟照之則左右前後事皆見 南史梁
州有古墓名曰尖冢或云張騫墳欲有發者輒聞鼓角
與外相拒椎埋者懼而退蕭數開之惟有銀鏤銅鏡方

尺龍城錄長安任仲宣家畜寶鏡謂之飛精識者謂
是三代物後有八字僅可曉仍篆籀云水銀陰精百鍊
成鏡詢所得云嵩山樵者石下得之後仲宣南驚洞庭
風濤洶涌因泊舟夢一道士赤衣乘龍詔仲宣言此鏡
乃水府至寶出世有期言當歸我矣因持鏡去仲宣睡
覺亟視篋中已失所在 劉餗隋唐嘉話僕射蘇威有
鏡殊精好曾日蝕既鏡亦昏黑無所見威以為左右所
汙不以為意他日日蝕半缺其鏡亦半昏如之於是始

寶藏之後櫃內有聲如磬尋之乃鏡聲無何而威子死
後更有聲無何而威敗 王度古鏡記大業八年四月
一日太陽虧度時在臺直晝卧廳閣覺日漸昏諸吏告
度以日蝕甚整衣時引鏡出自覺鏡亦昏昧無復光色
度以寶鏡之作合於陰陽光景之妙怪歎未已俄而光
彩出日亦漸明比及日復鏡亦精朗如故河北人張龍
駒為度下小吏其家良賤數十口一時遇疾度憫之齋
此鏡入其家使龍駒持鏡夜照諸病者見鏡皆驚起云

見龍駒持一月來相照光陰所及如冰著體冷徹腑臟
即時熱定至曉並愈以為無害於鏡而所濟衆於是令
密持此鏡遍巡百姓其夜鏡如匣中泠然自鳴聲甚徹
遠良久乃止度心獨怪明早龍駒來謂度曰龍駒昨忽
夢一人龍頭蛇身朱冠紫服謂龍駒曰我即鏡精也名
曰紫珍嘗有德於君家故來相託為我謝王公百姓有
罪天與之疾柰何使我反天救物且病至後月當漸愈
無為我苦度感其靈怪因此誌之 鏡龍記唐天寶三

載揚州進水心鏡一面縱橫九寸青瑩耀日背有盤龍
勢如生動進鏡官李守泰曰鑄鏡時有老人自稱姓龍
名護有小童名玄冥謂鏡匠呂暉曰老人解造真龍鏡
遂令玄冥入爐所扃戶三日夜開戶失二人所在爐前
獲一素書云盤龍盤龍隱於鏡中分野有象變化無窮
興雲吐霧行雨生風呂暉遂移爐於揚子江心以五月
五日午時鑄之帝詔有司掌此鏡七載大旱召葉法善
祠鏡龍忽龍口有白氣須臾滿殿甘雨如澍

寶鏡 洞冥記望蟾閣上有青金鏡廣四尺元光中波
祇國獻此青金鏡照見魑魅百鬼不敢隱形 梁四公
記扶桑國使使貢觀日玉如鏡方圓尺餘明徹如琉璃
映日以觀見日中宮殿皎然分明 孝經援神契神靈
滋液百寶用則璣鏡出注大珠有光可為鏡者 拾遺
記周穆王時渠胥國貢火齊鏡廣三尺六寸暗中視如
晝人向鏡中語則鏡中響應之 四公記扶南大舶從
西天竺國來賣碧玻瓈鏡面廣一尺五寸內外皎潔置

五色物於其上向明視之不見其質 陸廣微吳地記
通玄寺碑載則天皇后送珊瑚鏡一面宣賜供養

水火鏡

古今注燧銅鏡也以銅為之形如鏡照物則

影倒向日則火生以艾承之則火出

沈亞之上冢宰

書戎鏡包陽當日而矚之則能延燧興火

韋端符衛

公故物記火鏡等凡十三物

庶物異名疏高堂隆曰

陽燧一名陽符取火於日陰燧一名陰符取水於月並

以銅作之謂之水火之鏡考工記銅錫相半謂之鑑燧

之劑是火為燧水為鑑也搜神記曰金錫之性一也五月丙午日午時鑄為陽燧十一月壬子日子時鑄為陰燧禮秋官司烜氏掌以鑒取明水於月注鑒鏡屬取水者也世謂之方諸

鐵鏡 魏武上雜物疏御物有尺二寸金錯鐵鏡一枚
皇太子雜用物純銀錯七寸鐵鏡四枚貴人至公主九寸鐵鏡四十枚 西京雜記哀王冢中有鐵鏡數百枚
博古圖隋有十六符鐵鑑唐有二十八宿鐵鑑八卦

鐵鑑十二辰鐵鑑日月鐵鑑

以上有銘

鳳龜八卦鐵鑑四靈

八卦鐵鑑八卦方鐵鑑八角八卦鐵鑑

以上無銘

千秋萬歲

鐵鑑玉堂鐵鑑自明鐵鑑晉陽龍鐵鑑

以上有銘

戲水龍鐵

鑑鳳花鐵鑑雙鳳鐵鑑花雀鐵鑑寶花鐵鑑素園鐵鑑

以上無銘

天寶遺事葉法善有一鐵鏡鑑物如水人每有

疾病以鏡照之盡見臟腑中所滯之物然後以藥療之

酉陽雜俎苟諷有鐵鏡徑五寸餘鼻大如掌言於道

人傳受數人同照各自見其影不見他人也 九國志

宗壽建之族子得一古鐵鏡下有篆文十二字忽照見一青衣小兒坐酒樓上令人訪之青衣隨至曰此神物也終當化去不若還我與之剖腹納鏡而去 談苑京師有畜鐵鏡者謂人曰此奇物也以照人手則指端見白氣以氣之長短驗人之壽夭好事者乃以厚價取之既而詢之博物者曰此造作也蓋磨鏡時只以往手無以來手則照指自見其端有如氣者耳

石鏡 拾遺記周靈王時異方貢石鏡色白如月照面

如雪謂之月鏡 蜀王本紀武都丈夫化為女顏色美
好蓋山精也蜀王娶以為夫人無幾物故蜀王於武都
擔土於成都葬之蓋地三畝號曰武擔以石作鏡一枚
表其墓 潯陽記石鏡在山東有一團石懸崖明淨照
人 述異記日南國西南有石鏡光明瑩徹可鑒五臟
六腑亦名仙人鏡國中人有疾輒照其形遂知病起
何藏府即采神藥餌之無不愈

鏡臺 物原鏡臺始皇作 魏武雜物疏鏡臺出魏宮

中有純銀參帶鏡臺一純銀七子貴人公主鏡臺四

晉東宮舊事皇太子納妃有瑋瑁細鏤鏡臺一 世說

溫嶠娶姑女下玉鏡臺一枚 宋元嘉起居注韋朗為

廣州刺史作銅鏡臺一具御史中丞劉楨奏請以見事

免朗所居官 皇覽胡太后使靈昭造七寶鏡臺合有

三十六室別有一婦人手各執鑠纜下一闕三十六戶


一時自閉若抽此闕諸門咸啓婦人各出戶前 太平

廣記開元初東海馬待封為皇后造妝具中立鏡臺臺

下兩層皆有門戶后將櫛沐啓鏡奩後臺下開門有木
婦人手執巾櫛至后取已木人即還至於面脂妝粉眉
黛髻花應所用物皆木人執繼至取畢即還門戶復閉
如是供給皆木人后既妝罷諸門皆闔乃持去其妝臺
金銀彩畫木婦人衣服裝飾窮極精妙焉 品物類聚
張燕公有石綠鏡臺得自胡川道士玄宗聞其異取以
精炭十車燒之不變乃已

鏡奩 李肇翰林志翰林學士給銅鏡漆奩 清異錄

出行須物物輕便余取小薄鏡捨奩糊紙左右掩為鏡
室白牌題曰光明夾



格致鏡原卷五十六